

**DETAIL STATEMENT (MIZO) OF THE PUBLIC HEARING FOR OIL
EXPLORATORY DRILLING TO BE UNDERTAKEN BY OIL INDIA Ltd., AROUND
THENZAWL VILLAGE, SERCHHIP DISTRICT**

**VENUE : TUALVUNGI HALL, THENZAWL, MIZORAM
TIME : 18th August 2011; 12:00 Noon**

Thuhma:

Oil India Ltd. (OIL) leh Shiv-Vani Oil & Gas Exploration Services te tangkawp chuan India sorkar nen NELP-VI hnuaia Block MZ-ONN-2004/1 huamchhungah hydrocarbons zawn leh laihchhuah intawm inremna (production sharing contract) an ziak a. OIL hian 85 % participating interest (PI) a neih laiin Shiv-Vani Oil & Gas Exploration Services hian 15% PI a nei thung.

Block MZ-ONN-2004/1 hi Mizoram laihawl vela awm niin Lunglei, Serchhip, Aizawl district bakah Mamit district thenkhat a huam a. He block hi Mizoram khawpui ber Aizawl chhim lamah awmin a zauzawng hi 3213 sq. km a ni. Inremna, PSC-angin OIL hi he block chhunga thawk tura tih a ni.

Tunhmain he lai bial chhungah hian Oil zawnchhin a la ni ngai lo. He lai vel ramchhungah hian zirchianna chi hrang hrang 2-D Seismic Survey, Gravity Magnetic Survey, Geochemical Survey-te neih zawh tawh a ni a, 3 – D surveys pawh tih mek a ni.

He zirchianna atang hian OIL chuan an inremna-a Minimum work programme angin a thawh khatna atan kum 2007-2012 chhungin hmun 5-ah verh leh enchhinna neih a tum a; thawh hnihna chu kum 2012-2015 chhungin hmun khat-ah neih leh tur a ni ang.

Heng khurte bakah hian PSC-in a sawi angin oil/gas te hi a awm ngei a nih chuan lak chhuahna turin additional appraisal/delineation wells te pawh verh leh a ni ang. Aizawl khawpui hi be block hmar lam ber atangin km 5 vel a ni nghe nghe.

He public hearing hi hydrocarbon zawna tura lei verhna tur project chungchangah a bul vela cheng mipuite ngaihdan, sawiselna leh rawtna lakkhawmna tura buatsaih a ni.

He Vantlang Inrawnkhawm (Public Hearing) hi a ni, hun leh hmun ruatah neih a ni a. Chairman Pu H. Dolianbuaia, SDO (Civil), Thenzawl, Serchhip District, Mizoram in inkhawm a kaihruai a, chhun dar 12.00 ah tan a ni.

Inkhawm kaihruaitu hian he Public Hearing-a khawtlang hruaitute, sawrkar mi pawimawh te leh Oil India Limited lam te mipui lo kal khawmte hnenah a inhmelhriattir a.

1. Village Council Members, Thenzawl Village
2. Shri Robert Lalhmangaiha, SDC, DC Office, Serchhip District, Serchhip
3. Geology & Mineral Resources Department-a thawktute
4. Dr Rahul Dasgupta, Head NEF, OIL
5. Shri A. N Borthakur, Chief Geologist, OIL
6. OIL, Duliajan atanga lokal dangte

7. Shri C. Lalduhawma, Member Secretary, MPCB,
8. Mizoram Pollution Control Board-a thawktute.

Hemi zawh hian, inkhawm kaihrulaituin a sawm angin, Pu C. Lalduhawma, Member Secretary, Mizoram Pollution Control Board chuan he Vantlang Inrawnkhawmna koh a nih chhante, Environmental Impact Assessment Notification hnuaiiah ram hmasawmna project lian tham reng rengin Ministry of Environmrnt & Forests, G.O.I atanga Environmental Clearance an mamawh thu leh chumi atana he vantlang inkhawm hi neih ngei ngai a nih thu a sawi a He inkhawm hi Oil India Limited tan ni lovin mipuite ten he project-in a environment a nghawng tur chungchanga an ngaihdan lakkhawmna tur anih thu leh mipui phalna lakna tur erawh a nih loh thu a sawi bawk. Tin, he inkhawmna-a thu leh hla zawng zawngte ziaka record vekin, a video te nen Ministry of Environment & Forests-ah thawnthlak tur a nih thute a sawi a. Mipuite pawh company – in he mi project chungchanga zirchhinna an lo neih tawh atanga an ngaihdan te tlang taka sawi chhuak turin a ngen bawk.

Hemi hnu hian Inkhawm kaihrulaitu chuan Pu C. Laldinkima, Geologist, OIL chu project chungchang sawifiah turin sawm leh a. A ni hian he project-a kan tawng hriat ngai loh hrang hrangte a hrilhfiah hmasa a, tin, OIL hnathawh dan leh an hna kalpui dan turte a sawi bawk. He project atan hian an hnathawhna tur Block huam chhung 10 km bialah zirchianna an lo neih dante mipuite hrilhfiahin 5 km vela thuk khur laiin chu khur chu lei sehah 24” vel anih thu leh leichhungrilah a zuih thlak tur thute a sawi bawk. Zirchianna an lo neih tawh atanga Tuirial leh Tlawng lui tui quality te, boruak quality leh helai ram chhunga mite eizawmna bakah ruahtui tlak tam zawngte, boruak hnawn lam te leh a ram sik leh sa awm dante a sawifiah bawk. Tin, an hnathawhna-a boruak rimchhia siam thei H₂S an hmuh loh thu a sawi bawk. A hnathawhna atanga thil thleng palh thei leh a invenna an hman tur chirhdiak dahkhawmna atana khur te leh khur puak venna tur Blow Out Preventor (BOP) chungchangte a sawi bawk.

Project chungchang ngaihthlak anih hnu hian Inkhawm kaihrulaitu chuan mipui lo kalkhawmte chu an ngaihdan chi hrang hrangte zalen taka auchhuahpui ngam turin a chah a, Tichuan, sawihonain zuin a hnuai mi ang hi sawihona chipchiar te chu an ni:

1. T.C. Laltlanthanga, YMA Representative:

“Hrilhfiahna te ka han thlir a, mahse a la ler deuhin ka hria. Helaiiah hian bul tan mai tur em ni? Thenzawlah hian oil laihchhuah tur a awm nghal mai em ni? Oil hi a awm ngei em? A awm a nih chuan chiang deuh hlekin min hrilhfiah thei lo maw?”

OIL: *Kum 2007 atang khan he lai ram velah hian hna hi kan thawk tan tawh a. A ram leilung hrim hrim zirna, geological survey te, seismic study kan tih mai, lei 25-30 m emaw vel verha lung hal hmanga zirna te, lei chunglang lunga chemical awm te zirna geochemical studies te kan lo nei tawh a. Heng kan zirchhinna atang hi chuan oil a awm loh pawhin gas chu a awm ngeiin kan ring. Chuvang chuan verh turin hma kan la mek a ni Amaherawhchu, Oil kan verh chhuah / lak chhuah hma loh chuan a awm kan ti thei lo.*

2. K. Lalpara, Member, V.C, Thenzawl:

“Oil zawnga hma in rawn lak dawn avang hian kan lawm hle a, mipui tan hlauhawm thei tur ang chi pawh awmin a lang lem lo va. A hnuai lawk saw vantlang kawng a ni a, saw lai

atanga hlauhawm thei ang tur chi saw a awm thei ang em? Tin, kan hotute zingah hian oil laih chhuahnaa lo thawk tawh te pawh in awm ngeiin ka ring a, chungte chuan an laihchhuah dan tlangpuite leh a bul vela cheng mipuite nena an inlaichinna ang chi te kha a hmuna in tawnhriat atangin vantlang hi min rawn hrilhfiyah thei ula, ka lawm khawp ang.”

OIL: “A zawhna rawn zawh kha a lawmawm hle a, a zawhna kha ama mimal thil ni miah lo vantlang tan a rawn zawt a; khatiang VC, khawtlang ngaihtuahtu in nei kha a lawmawm hle a ni.”

“Kan verhna tur hmun hi kawng atangin a hla lo va, a hmun chu ka sawi hrih lo vang a. Kha kan VC khan a hre chiang hle a niang chu ka ti mai a. Kawng leh khua atanga a hlat zawng te engkim Norms kan nei vek a. Heng dan te hi zawmin, a thawm emaw, mei khu emaw vaivut khu emaw, kan hmanrua/khawl chet velna emaw-in kawng leh mipui te tibuai lo turin chetlak kan tum a ni. Engmah a tibuai lovang chu kan ti lo, a chang chuan traffic te pawh tlem chuan a khawih ve thei deuh ang chu. Amaherawh chu nunphung pangngai chu a khawih buai lo turah kan ngai.”

3. R.Hmangaihzuala, Secretary, MUP Unit, Thenzawl

“Project chungchang kha in han sawi a, mahse mipui lam hi kan chiang chuang vak lo hle. Heng Zirlai naupang lo kal te pawh hian khawi laiah nge an laih/verh dawn tih pawh kan la hre lo a ni. Mipui te hi chuan Thenzawl ramah an verh dawn tih kan hre ringawt a, a verhna hmun turte hi a puan theih em? Tin, Thenzawl khawdai velah hian leirawhchan an rawh thin te pawh hi khawchhung tan hian hrisel lohna a thlen niin kan hria a. Chuvangin, dai hnaite-a hetiang Oil laihchhuahna pawh hian harsatna/hrisel lohna a thlen mai lo maw? Bhopal-a gas leak –in mipui tam tak thihna a thlen thu te pawh chanchinbuah leh TV-ah te kan lo hmu thin a. Tuna in ruahmanna pawh hi mipui tan hian harsatna thlen thei, thil pawh thei ani mai ang em?”

OIL: *Khawtlang tana zawhna tha tak kan dawng zel a, a lawmawm thei hle mai. A laihna tur Drilling rig hi a lema kan hmuh ang khan khawl a ni a, khawl nung lo a ni a, a tivir turin a sirah generator hun a ni ang. He generator atanga mei khu hi boruak chhia siam tur chu a ni mai a, chu chu truck lian pakhat meikhu tihchhuah nen a inang vel ang. Chuvangin hlauhawm tham lo turah kan ngai a, a ngaimawhawm tham lo bawk ang. Tin, a verh khawl hmanga hnathawh hun chhung hi thla thum atanga thla 4 emaw a rei berah thla 5 vel a ni ang. Chuvang chuan meikhu ngaimawh tham a siam lo vang.”.*

4. Zoramsanga, Editor, Thenzawl Today, Thenzawl:

“A verhna hmun tur leh a zau zawngte min hrilh thei em? A Norms ah hian pollution mipui tana hlauhawm chin in tih kha eng nge?”

OIL: *Hnathawhna tur hmun chu Aizawl atanga kala Thenzawl thlen hma km 4 velah a ni ang. A zau zawng chu Lammual phel phawk vel a ni ang. Duhthusamah chuan lammual tiat vel kan mamawh a, mahse tlang ram a nih avangin a harsat viau dawn chuan a zahve velah kan inbeng theiin kan ring.”*

“Pollution chungchangah kha chuan kan Pollution Control Board lama kan Member Secretary hi kan sawm ang e.”

Member Secretary, Mizoram Pollution Control Board: “Kan hotupa khan an sawi nep viau dawn a, kan tia nge. Generator khu engmah a ni lo vang kha a tia, keini chuan engmah a ni e kan ti ve thung a, kan ngaimawh khawp mai a.”

Generator khu leh meikhu dang ang chi ah te hian kan hnen atangin nakinah phalna an lak vek a ngai a. An DG dah dan tur leh meikhu dawt an siam dan tur te kan siam vek ang. Tin, keini bakah Ministry of Environment & Forests atangin Environmental Clearance an neih chuan, chutah chuan an bawhlawh chirhdiak (water based mud) ang chi te, an paih dan engkim chiang taka rawn tarlan thin a ni bawk a ni. Heng dan te an zawm that leh that loh en fiahtu tur kan ni a, a bengchhng chi emaw, a khu chi a ni emaw, standard leh norms kan neih mil zelin kan endik dawn a ni. An zawm that loh chuan an hnathawh lai kan tihtawp sak leh mai dawn a ni.”

Leirawhchan siamna chungchang kha zawhna a awm a, Leirawhchan leh industry dang dangte kan hnen atanga phalna lak ngai vek a ni a, tuntumah kan lo kal pawh hi chung leirawhchan siamna leh thilsiamna hmun dang kan hnena phalna rawn dilte pawh kan endik nghal ang.”

5. Sailoliana, Teacher, Thenzawl High School:

“Vawiinah thil ropui tak mai kan tawng a, a lawmawm hle a. Zawhna mawl te te pathum ka nei a. Hetianga corporation ropui tak mai an rawn che tur hi kan lo phur a, engzat chiah nge a senso tur hi le?”Pahnihna ah chuan he hna hian employment eng anga lian nge a ken tel ang? Kan tualchhung thalaite inhlawhna turte hi a awm thei ang em? Labour engang chi nge, eng class nge an rawih dawn, Serchhip district tan hian engang chin nge lukhawng a neih ang? Pathumna atan chuan Oil hi lo awm ta se la, engtin nge ni zel ang?”

OIL:

i) “*Budget hi thil tam takah a innghah avangin a diktak hi sawi fak a harsa a, Crores 25-30 aiin a tlem lovang.*”

ii) “*Drilling kan tan hun chuan unskilled leh semi-skilled labour-te a tam thei ang ber khawtlang mi kan chhawr ang a. Amaherawhchu oil drilling hi thiamna bik deuh ngai a nih avangin Mizoram Govt.nen pawh kan sawi tawh a, helama mite train turin kan ngen a ni. Skilled labours chungchangah chuan tunah pawh helai kan rawn thawh hma pawhin Mizo officer 4 an thawk mek a, mi 9 dang bakah sportsman pawh Mizo pathum lai kan nei. Hna-a khawtlang mite duhsak hi Oil India policy a ni.*”

iii) “*Oil hi a lo awm chuan kan la chhuak ang. Transportation hi a buaithlak dawn avangin Mizoram Govt, hi inrem siampuiin industry-te siam hi kan duhdan ber chu a ni. A tam tham chuan pipeline hmanga hmun danga thawn chhuah pawh kan tum ang.*”

6. Z.D. Lengchawna, Thenzawl:

“Project ropui deuh mai chungchangah kan inkhawm a, amaherawh chu he thil-ah hian mipui kan blind a ni. Kal hmang engmah kan hre lo a, zawhna pawh kan zawt thiam lo. Oil India hian a nihna tak an puang lo. Thenzawl ramah oil verh tan a ni tawh dawn a, mahse a verhna hmun pawh kan la hre lo. A verhna tur hmun min hrilh tha duh loh hian zawhna

pawh mi ti zawt thiam lo. He thil hi ka lo ngaihven ve tawh hle a, a hmun tur pawh ka hre Chiang tawh a.

“Mizoramah hian hmun rukah verh tur a ni a, Executive Summary-ah hian location 2,4,5 leh 8 chauh hi tarlan a ni a, chumi zingah chuan pathum (3) chu verh hmasak tur tih a ni a, ka zawhna hmasa ber chu chung khur an verh hmasakna tur hmun 3-te hi khawite nge?”

“Thenzawl rama an thawh tumna thlang lawkah hian Lau Lui a awm a. an thawh tumna hmun hi Lau lui hnar a ni a, minute 15 kal lek a ni. A kamah leilet te pawh a awm bawk a. Company dangte hnathawh dan ka ngaihthuahn fel taka tih dan tur puang chhuak si hian a tawpah lo lam deuha tih an ching a, oil chhia te thil tha lo pui pui an lai chhuak dawn a, he Lau Lui tan hian a pawh thei ang em?”

“Oil verhna tur hi kawng bul mai a ni si a, lirthei kal vel a pawh thei ang em? He lai kawng hi Aizawl – Lunglei Road a ni a, minute 5 dan zelah motor a kal a, a bengchhen chuan lirthei tan a pawh thei a ni. Chuvang chuan helai hi lirthei tan a him tawh ang em?”

OIL: “Hmun 6 ni lovin hmun 8 keini hian kan nei a, chungte chu

- 1) Location 1 - Keifang Dai
- 2) Location 2 - Phulmawi ramah
- 3) Location 3 - Maubuang
- 4) Location 4&5-Darlung/S.Sabual
- 5) Location 6&7- zir nawn leh tur a dah a ni.
- 6) Location 8 – Thenzawl”

“HDPE lining hmangin kan bawlhhlawh verh na thli (effluent) kan fun vek dawn a, a thlanga lui chu a tibawlhhlawh lo ang.”

“Hnathawhna ri hi chu motora chuang tan chuan a bengchhen phak ka ring lo. A bengvar deuh te chuan an hre phak mai thei e.”

“Kawngpui leh mihring tana ri bengchheng him chin ang chi te leh effluent treatment pit te pawh a him chin dan awm angte min hrilhfiahsak turin Member Secretary, Mizoram Pollution Control board ka sawm e.”

Member Secretary, Mizoram Pollution Control Board: “Ri beng chheng chungchangah khawl thil reng reng chu khawl atanga hlat zawng siamsa atangin kan teh thin a, tehma decibel hmangin kan teh thin a ni. Khatiang khan standard a nei sa vek a. Generator a KVA a zirin a pelh loh tur chin standard a awm a, a lo ri ring a nih chuan rithupna an vuah tur a ni tih te a awm sa vek a ni a, a chimney san zawng thlengin an tih tur danin a siam sa vek a ni.”

“Effluent treatment pit chungchangah OIL ho pawh hian danin tih tur a tih ang thlap hian an tih a ngai. Mipuite pawn an ruahman angin an kal em, Kan ti ang an tih ang khan an ti ngei em tih in lo endik a tul a ni.”

OIL: Organisation dangte’n an tih chu ka hre lo va, mahse Mizoram Pollution Control Board-in an siam norms leh mipui te duhdan angin kan kal ngei ang tih ka tiam che u.”

7. L. Sailova, VCP, Thenzawl:

“Oil laih nan lammual chanve vel laih zawl a ngai ang in ti a. Oil/gas lak tur lo awm ta lo se emaw, lakchhuah tham lo awm lo ta se, a ram neitu te hian compensation lo hmu mahse an chang let leh thei tho ang em?”

“Mipuiin kan chhawr theih tur ang chi entirnan field lian tawk tak min laihsak te, supermarket sak te leh thil mamawh tenau dangte pawh kan nei thei a, OIL te hi mipui ten min promise thei ang em? “

OIL: “*Lo chhuahsan ngai ta se chuan State government rawn a nga, ti rawh u a tih angin kan ti ang. Keini chuan tunah chuan chutiangan kan ti ang tih kan sawi thei rih lo. Sawrkar nena indawr phawt tur a ni e.*”

“*Super market leh field chungchang kha, tunah hian bul kan tan chauh a ni a, CSR activities tihlawhtling tur chuan oil kha lakchhuah tham (commercially viable) a awm phawt a ngai. Tunah chuan a awm dan tur chiah kan la hriat loh avangin thil lian tham engmah kan la tiam thei lo. Thil lian tham vak lo chu kan ti thei ang, mahse tunah chuan project lian tak chu kan la nei thei rih lo. A pawl kan ti khawp mai.*”

8. Liantluanga Renthlei, Editor, Vantawng:

“Mizoram Oil awm tura beisei zat kha 3.32 MMT a ni in tih laiin lakchhuah theih zat kha 0.099 MMT chauh a ni leh si a, a va in thlau ve? Engvang nge?”

OIL: “*3.32 MT kan tih kha a tlem thei ang bera sawi a ni. Hydrocarbon exploration hi thil Chiang lo tak mai a ni a, Hydrocarbon awm tur zat ni a kan sawi 3.32 MMT kha surface study atanga kan siam a ni. Kan la lai chin dawn chauh a ni. Kan laih hnuaah heng a zatte hi chu a danglam vek ang. Heng kan figure pekah hian lo inngat lutuk lo ula. Mihring emaw Instrument engmahin oil awm zat a sawi thei lo, leilung kan zirna atanga a awm zat awm kan chhut chhuah ani a, 0.099 MMT hi lak chhuah theih zat nia kan chhut chhuah ani. Verh taktak hunah a la danglam thei. 15 MMT a awm ti ta ila, naktukah in lo kal ang a, 3.32 MMT chauh in laichhuak leh si in ti mai ang. Heng hi chu kan zirchhinna atanga kan rindan leh kan besisei zat mai chauh ani.*”

“*Tin, a awm zat leh a lak chhuah theih zat in thlah chhan chu a awm zawng zawng a lakchhuah theih loh vang a ni. Hmun hrang hrangah hydrocarbon te hi an tlingkhawm a, a senso tur nena khaikhina lakchhuah tur tlem lutuk ang chi a awm thei. Chutiang a nih avang chuan a awm zawng zawng a lakchhuah theih loh a ni.*”

9. K.I. Ramfangmawia, Teacher, Thenzawl Higher Secondary School:

“Ka zawhna chu Pollution Control Board lamah a ni daih thung a. Thenzawl daia hna an thawk tur hi a lawmawm khawp mai a. Noise, environmental, etc pollution chungchang hi kan bangbo hle a ni.”

“An hnathawhna hian Pollution engang nge, eng chen nge a thlen theih? MPCB-in eng ang chen hi nge tha in tih loh? Mipui-te pawh hi engtin nge kan lo inven ang? Kan zualko theih dan tur te min hrilhfiah sak thei em?”

“ONGC hi kan hriat ve chin chu a ni mai a, an drilling tih nasat ang huin an success rate a hniam viau mai a. Chuvangin OIL hian Success rate percent engzatchiah nge a neih? A remchan chuan an achievement record hriat ka chak deuh a, min hrilh thei ang em?”

“Engvangin nge Thenzawl dai hi a hmasak. Beisei san vang em ni?”

“Polythene a tuam ek chhia kha engtia tih tur nge? Phum a, amaha tawih ral mai tur nge, Lau luia paih mai tur?”

Member Secretary, Mizoram Pollution Control Board: “Pollution chungchang hi chu sawithiam a har ang reng a. Pawn lam atanga an zir danin oil emaw gas emaw awmin an hria a, finfiah turin an lai chhin dawn chauh a ni, hna an la thawk mang dawn lo a nia. A verhna tur pawh lian lo tak feet khat bial vel lek thuk takin an lai dawn chauh a. Oil /gas hi a lo awm lo a nih chuan an hnathawh hmunte a hmaa awm dan pangngai ang deuh thaw a siam leh a ngai. Oil /gas a lo awm a nih chuan hna thawhna tur project hran an siam a nga, dilna thar siam lehin public hearing dang koh leh a tul ang. Tunah rih hi chuan pollution la awm vak lo ang. A laihna khu a awm ang a, generator atangin khu leh ri bengchheng a chhuak bawk a nga, tin an verhna chirh water based mud siam atang leh motor leh khawl ri bengchheng avangin pollution a awm thei bawk. Generator an hman tur hi a len deuh dawn avangin a thawm pawh a nasa ang a, an zawm tur chin dan fel tak kan nei a, chumi zawm chuan hna an thawk thei ang.”

10. Liantluanga Renthlei, Editor, Vantawng:

“Oil hi lo awm ta se, Thenzawl-ah refinery dah in tum em? A hmun a laili si a, Thenzawlah in ti thei lawm ni?”

OIL: “Nichina Success rate chungchang zawhna kha ka’n chhang hmasa phawt ang a. Kan hmunpui Assam-ah chuan 70-80% vel a ni a, Assam pawnah chuan 50% vel a ni.”

“Refinery chungchangah chuan OIL hi refinery company kan ni lo va. Oil hi lo awm ta se company dang HPCL, BPCL, IOC, te nen thawk hovin anmahni in an buaipui. Oil India chuan a laichhuak a, a refine lam chu mi dang kan pe ang.”

“Thenzawl kan thlanna chhan chu mipui in that vang a ni mai. A bakah chuan kan zirna atanga oil/gas a tam leh tam loh te, tlangram a nih avangin a hmun rual rem dan azir te-in kan thlang. Oil awmdanah chuan Thenzawl hi pahnihna a ni a, mahse logistic concern te nen thlirin kan thlang a ni ber mai.”

“Polythene tuam chungchang kha chu khur lian deuh kan lai ang a, a sir leh hnuai polythene-in kan tuam chhuak vek ang. Chutah chuan chirhdiak (WBM) an hman duh tawh loh kha khurah chuan kan dah ang a, hnathawh zawh-ah pit chu polythene-in kan khuh ang a, leiin kan chhilh leh vek ang. Hetah hian toxic material kan verh chhuak palh a nih chuan proper treatment kan pe ang a. Leia chhilh tawh hnu chu mahin a tawih ral tawh mai ang.

Chirh mai a nih avangin thil hlauhawm a keng tel hran lo va, chuvang chuan hlauhawm lo turah kan ngai.”

Hemi zawh hian minute chhiar a ni a, siam that ngaite siam that a nih hnuah Chairman-in hming a ziak hnan a. Mipui hnena lawmthu a sawi hnuah Chairman-in a ti tawp ta ani.